

GALLESIA

Poll-ni GALLESIA-Yambuma Pepá Topa Sirim Bukele

Poll-ni Pepá Topa Sirim Ilinga Ung-Pulu Mare
 Poll molupa tirim mele ung-pulu mare kene
 yu-ni pepá topa sirimeliinga ung-pulu mare kene
 buk-gomú 682 molemú.

Kolea Gallesia akili ‘distrik’ niku ‘propinj’ niringko. Pulu Yili-nga bukna télendu nilimúnje, mimi-siku naa piliilimili. Poll Gallesia pupa andurum temani mare Liipa Mundurum Yima 13:16—14:25 mele, 16:6, 18:23 molemú.

Gallesia pepá akiliinga ung-pulu te i-sipa mele: Ui Juda-yambuma mindi Yesos-nga ta-lapele muluring. Akiliinga-pe Poll penga Juda-yambu naa molku yambu-lupama muluring kolea puleliinga andupa temani-kaiéle topa sirim kene yambu-lupa kanumanga mare Yesos-nga talapena sukundu uring kene buni te wendu urum. Buni kanili i-sipa mele: Moses-ni “I-siku teai! I-siku naa teai!” nimba Pulu Yili-nga ung-mani sirimuma ui Juda-yambuma piliiku liiku tiring mele yambu-lupa kanuma-ni naa piliiku tiringeliinga Juda-yi mare-ni niku mele: “Juda-yambu naa molemelema-ni Krais-nga yambuma kamu mulungíndu yima kene kangma kene Moses-ni “Teai!” nimba ung-mani sirim mele piliiku kene eninga kangi te kopsiku poku teku wendu liangi. Moses-ni ung-mani sirimuma pali piliiku liiku teangiko.” niring. (Ung te Liipa

Mundurum Yima 15:5 molemú. Akuna 15:1-6 pali kanani. "Mólu." niring mele ung te 15:19-21 molemú.)

Juda-yi kanuma Gallesia propinj akuna anduku Krais-nga talapena yambu muluringmandu niku mele: " 'Sika' niku piliilimili ulu akili-ni mindi eni naa tepa liimba. Moses-ni "Teai!" nimba ung-mani sirimuma kepe piliiku liiku teangiko." niring akiliinga-pe Poll-ni nimba mele: "Aima mólu!" nirim. "Yesos Krais yu 'Sika' nimbu tondulu mundupu piliimulú uleleni mindi Pulu Yili-ni oliu kanupa kene oliunga ulu-pulu-kísima kanupaconde tenjipa, 'numanu sumbi-nimba pili yambuma' nimba kanolemú, yu-kene wasie kapula-kapula molemulu kupulanumele akisinjilimú. Ulu kanili-ni mindi oliu molupu konjupu mindi pumulú ulu-pulele liimulú kupulanumele akisinjilimú. Moses-ni "Teai!" nimba ung-mani sirim akuma-ni oliu tepa liimba ulu te naa pelemú." nimba pepá ili enini topa sirim. Ung akiliinga ung-pulu tondulu te Gallesia 2:16 molemú.

Buk Rom kene Gallesia-selenga sukundu ung tondulu pelemú pulele tilu-sipa. Ung-pulu mare bukeliinga alsena "26. lo", "18. katim skin", "31.3. pikinini bilong God", "45. stretpela man", "2. arapela lain" molemú kanui.

Ya Gallesia pepá turumeliinga ung-pulele pora nikem.

**Kolomong-Auli 1-2 Pulu Yili-ni
Yunu Poll Makó Topa "Krais-nga
Kongunale Tenji-Pui." Nimba**

Liipa Mundurum Ung Te

1:1-5 Poll-ni Pepá Ili Tombandu Ui-Pulu-Pulu Turum Ungele

¹ Na Poll, Yesos-ni “Nanga kongunale tenji-pui.” nimba liipa mundurum yi te. „Manayambuma-ni ‘Kongun akili ti-pui.’ niku na makó naa turing. „Manayi te-ni “Nanga kongunale tenji-pui.” nimba liipa naa-ko mundurum. Yesos Krais kene Krais kulurum kene topa mak-injirim Lapa Pulu Yili-kene akusele-ni mindi na “Elsengla kongunale tenji-pui.” nikulu liiku munduringli.

² Na-ni eni Krais-nga yambu-talapele kolea Gallesia „propinj, taon-manga máku toku molemele yambuma pepá ili topu siker. „Nakene wasie kongunale tapú-topu telemulu, anginipilima wasie molupu kene pepá ili topu siker.

³ Oliunga Lapa Pulu Yili kene Auli Yesos Krais-seleni eni we kondu kolkulu, ‘Eni numanu waengu nipili táka-niku molangi.’ nian-gli. ⁴ Auli Yesos Krais kanili yu-ni yunu ‘Oliu tepu liambu. Oliunga ulu-pulu-kísima mania pupili. Oliu, mana-yambuma ulu-pulu-kismanga sukundu naa molangi nimbu tepu wendu liambu akiliinga eninga nimbu kolunjambu.’ nimba kulunjurum yili. Aku tirimele Lapa Pulu Yili-ni ‘Teani.’ nirim mele piliipa liipa tembandu aku tirim. ⁵ Lapa Pulu Yi kaniliinga bili kam-kamu ola pepa mindi pulimú. Aku-sipa sika tipili.

1:6-10 Temani-Kaí Tili Mindi Pelemú Ungele

⁶ Krais-ni eni we kondu kolupa kene eninga nimba tinjirimeliinga Pulu Yili-ni “Eni nanga yambuma molangi wai.” nirim mele eni piliiku liiring mele nondupa numanu topele toku, ‚yi mare-ni, “Teman-i-kaiéle topu sikemulu mele pilangi.” nilimele temani te lupa piliiku molemeláliinga na eni-kene numanu kis panjipu numanu pulele liipu mundupu moliu.

⁷ Akiliinga-pe temani kanili sika temani-kaiéle mólu. ‚Teman-i-kaí te-lupa aima naa pelemú!‘ Yi mare-ni eni teku bembá siku “Krais-nga temani-kaiéle topu sikemulu.” niku ung mare lupa alowa-malowa teku Krais-nga temani-kaiéle teku kis-singí tekemele. ⁸ Akiliinga-pe oliu-ni kepe, mulú-koleana molemú angkella te-ni kepe, temani-kaí te-lupa topu sipu, oliu-ni eni ui-pulu-pulu topu sirimulu temani-kaiéle mindi naa túmulu lem ‚aku-sipa gólu tomba yili, Pulu Yili-ni ‘Yu taki-taki mindili nomba mulupili.’ nimba ‚kolea-kísina liipa,‘ mundupili. ⁹ Ui na-ni ya nindu mele ekupu alsupu niker: Ui temani-kaiéle ‘Sika’ niku piliiku liiring kanili yambu te-ni naa topa sipa, “Teman-i-kaiéle tokur.” nimba temani te-lupa topa símu lem ‚Pulu Yili-ni, ‘Yu taki-taki mindili nomba mulupili.’ nimba ‚kolea-kísina liipa,‘ mundupili.

¹⁰ Ekupu na-ni ya ung nikerale ‘Yambuma-ni na kape niku ‘yi kaiéle.’ niangi.’ nimbu niker mola ‘Pulu Yili-ni na kape nimba ‘yi kaiéle.’ nipili.’ nimbu nikerye? Mola ‘Yambuma-ni piliiku kene numanu sangi.’ nimbu temani-kaiéle topu siliuye? Na-ni ‘Yambuma numanu sangi.’ nimbu uluma telkanje na Krais-nga

kongun tinjili kendemande te naa molka.

1:11-24 Pulu Yili-ni 'Poll Kongun Andupa Tipili.' Nimba Makó Turum Mele Temanele

¹¹ Nanga ‚Krais piliilimili, anginipilima, na-ni temani-kaí eni topu sirindu kanili ‚mana-,yambu te-ni numanale-ni piliipa kene na nimba sirim temani te mólu. ‚Akili aim aima piliai!‘ nimbu niker. ¹² Temani-kaí kanili ‚mana-,yambu te-ni na topa sirim-na piliipu liipu andupu naa topu sirindu. Temani kanili yambu te-ni na ung-bo naa tonjurumko. Aima mólu. Yesos Krais-ni ‚Temani kanili Poll piliipili.’ nimba na temani-kaí akili liipa ora sirim-na piliipu liirindu.

¹³ ‚Na ui ‚Krais-nga temanele ung-sika te aim mólu.’ nimbu piliipu aim aima numanu lupa pípili mulurundeliinga Krais-ni yunu na naa liipa ora silkanje aim aima piliipu naa liilka.‘ Na ui mulurundu mele eni temanele piliiring. Na ui Juda-yambumanga ung-manima aim aima piliipu tepu molupu, enini Pulu Yili kape niku popu turing mele na-ni aku-sipu tepu molupu kene, Krais-nga yambu Pulu Yili-nga talapena muluringma aim aima tondulu mundupu mindili liipu sipu, ‚Yambuma pali Krais-nga ungele kamu munduku kelangi. Yunga talapele kamu pora nimba mania pupili.’ nimbu aku tirindu. ¹⁴ Na-kene kapula miring Juda-yimanga pulele topu aele lenjipu, na-ni Juda-yambumanga ulupuluma aim ola-kilia piliipu tepu molupu, oliunga anda-kolepalimanga ung-manima aim aima tondulu mundupu piliipu liipu, ‚Yambuma piliiku liiku teku molku, ung-mani kanuma aim aima

munduku naa kelangi.’ nimbu ung-manima aima mimi-sipu nukurundu. ¹⁵ Akiliinga-pe na ui naa meangi Pulu Yili-ni na we kondu kolupa , ‘yunga yili molambu.’ nimba, makó turum, Pulu Yi kanili-ni yunu temba mele numanale-ni piliipa kene ¹⁶ ‘Na-ni yunga Málale kanupu bi sambu.’ nimba liipa ora sirim. ‘Juda-yambu naa molku yambu-lupa molemelena na andupu yunga temani-kaiéle topu sambu.’ nimba yunga Málale na liipa ora sirim. ‘Numanu topele topu Krais-nga yi te molupu kene, na-ni ,manayambu te-ndu “Na nambi tembunje? Temani-kaiéle piliambu na tokunu si.” naa nirindu. ¹⁷ Na ui aku-sipu naa molambu Yesos-ni ui kumbilepa “Nanga kongunale tenji-pai.” nimba liipa mundurum yima kolea-auli Jerusallem muluringna naa-ko purundu. ,‘Pulu Yili-ni na ung-bo tunjupili.’ nimbu, sumbi-sipu kolea Areپia pupu akuna ena mare mulurundu. Penga kelepu kolea-auli Damaskas-ndu yandu ,ombu ung-bo tonjupu mani sipu, mulurundu.

¹⁸ Kanu-kene ,‘Pulu Yili-ni yunga Málale na ui liipa ora sipili penga, punie yupuku omba purum kene ‘Na Pita kanupu bi sambu.’ nimbu Jerusallem pupu, yu-kene wasie kóru tale mulurundu. ¹⁹ Yesos-ni “Nanga kongunale tenji-pai.” nimba liipa mundurum yimanga te wasie naa kanurundu. Auliele-nga angin Jemis mindi kanurundu. ²⁰ Na-ni temani pepána topu siker ili gólu naa tokur. Pulu Yili kanupa mulupili mi lepu eni nimbu siker akili aimá sika nimbu siker. ²¹ Penga na kolea Siria kene Sillisia

propinj-selenga andurundu. ²² Kolea Judia distrik sukundu kolea wemanga Krais-nga yambutalapema-ni na naa kanuring. ²³ Tirindu mele temanele mindi ui piliiring. Akili i-sipa mele: “Oliu ‚Krais-nga yambuma, andupa mindili liipa sirim yi kanili-ni temani-kaiéle ui ‘Kamu mania pupili.’ nirim temani-kaí kanili ekupu yu-ni andupa topa silimú.” niku yambuma-ni temani toku siringele mindi piliiring. ²⁴ Pe Pulu Yili-ni na-kene tirim mele pilikuliinga Pulu Yili kape niku bi paka tunjuring.

2

2:1-10 Yesos-ni Kumbi-Lepa “Nanga Kongunale Tenji-Pai.” Nimba Liipa Mundurum Yima-ni Poll Kongun Tirim Mele “Tipili.” Niku Enini Yu-Kene Numanu Tiluna Pupili Kapula-Kapula Muluring Temanele (1:11 pulu monjukunu kanui)

¹ Penga punie malapunga tale omba purum kene na kelepu ‚wale tale-sipu, Jerusallem purundu. Banapas-kene wasie purumbulu. Taitas na-ni liipu mirindu, wasie purumuluko. ² Akiliingga-pe ‚Krais-nga yambu Jerusallem muluringma nukuring yima-ni nandu “Ui.” niringeliingga piliipu kene naa purundu. Pulu Yili-ni ‘Na pambu.’ nimba, liipa ora sirimna purundu. Pupu kene na-ni Juda-yambuma naa molku yambu-lupama muluring koleamanga andupu temani-kaí topu sirindele nimbu sirindu. Akiliingga-pe ‘Na-ni andupu yambuma tepa liliimú kongunale teliu mele kene, ui kongun tirindu mele kene, kamu mania naa pupili.’

nimbu Krais-nga yambu-talapele nukuring yima kanupu bi sipu, we-yambuma naa molangi yi kanuma eni-enini tengalupa molangi temani-kaí andupu topu sirindele nimbu sirindu.³ Sika Krais-nga Juda-yi mare-ni piliiku kene, “Juda-yambu naa molku yambu-lupa molemelemanga yima Krais-nga yima kamu mulungíndu eninga kangi te kopsai.” niring, akiliingga-pe Taitas na-kene mulurumbulu yili yu sika Grik-yili akiliingga-pe yi-auli kanuma-ni “Yunga kangi te kopsinjamili.” niku karaye naa tiring.

⁴ ‘Kangi kopsili ung te wendu naa olka akiliingga-pe, yi gólu tuli mare enini oliundu ‘Eninga angnipilima.’ niku Krais-nga talapena kiyang niku uring. ‘Oliu Krais Yesos-nga yambuma molemuláliinga Moses-ni ‘I-siku teai!’ nimba ‘I-siku naa teai!’ nimba, ung-mani sirim kanuma-ni oliu naa nokulemú. Kanuma naa piliipu liipu ka-lkuna mele naa molupu we molomulú kene kapula.’ nimbu mulurumulu mele gólu tuli yi kanuma-ni ‘Kanamili.’ niku uring. ‘Moses-ni ung-mani sirimuma piliiku liilimele yambuma mindi Pulu Yili-ni kanupa ‘yambu sumbi nílima’ nimba kanolemú mele piliangi.’ niku ‘gólu tuli yi kanuma Krais-nga yambu-talapena, uring, akiliingga-pe ‘Aku tiringeliinga ‘Moses-ni “Teai!” nimba ung-mani sirimuma-ni oliu ka sipili, molku kis-sangi.’ niku uringele.’ nimbu piliiker.⁵ ‘Yambu-lupamanga yimanga kangi te kopsai.’ niring akili sika niring, akiliingga-pe eninga niring ungele aimaa naa piliipu liirimulu. ‘Moses-ni ui ung-mani sirimuma-ni laye-kolte kepe oliu Krais-nga yam-

buma naa nokulemú. Temani-kaiéle mindi ung-sikale, akili-ni mindi eni nukupili, akili mindi eni-kene pípili.' nimbu "Aima mólu!" nirindu.

⁶ „Jerusalleм Krais-nga yambuma-ni, “Oliunga yi-aulima” niring yi kanuma ‘Enini sika bi molemú mola naa molemúnje, akili ulu te mólu.’ nimbu piliiker. Pulu Yili-ni kangikundu kanupa ‘Kamakoma’ nimba ‘bi naa mulúlima’ nimba yambuma apurupa naa kanolemú. Yi kanuma-ni na ung nimbu siliáliinga ung tepa liipa nokupa konjumba ung te-lupa naa niring. ⁷ Aima mólu! Pulu Yili-ni Pita-ndu “Juda-yambuma temani-kaiéle pukunu toku si.” nirim mele aku-sipako nandu “Temani-kaiéle Juda-yambu naa molemele yambu-lupama pukunu toku si.” nirim mele kanuku kene „I-siku ni. I-siku naa ni.” niku ung te olandupa naa niring. ⁸ Yesos-ni Pita-ndu “Juda-yambuma mulungína nanga kongunale tenji-pui.” nimba liipa mundurum kene Pulu Yili-ni yu tondulu sipa liipa tapunjupa mulupili kongun kanili tinjirim kanu mele Yesos-ni nandu “Juda-yambuma naa molemele yambu-lupama mulungína nanga kongunale tenji-pui.” nirim kene Pulu Yili-ni na tondulu sipa liipa tapunjupa mulupili kongun kanili andupu tirindu mele kanuku kene, ⁹ Jemis kene, Pita kene, Jon kene, „Jerusalleм, yambuma-ni “Enini oliu nokolemele yi-aulima.” niring yi kanuma-ni Pulu Yili-ni na kongun ili aimá sirim mele kanuku kene, „Sika kongun tilu-sipu telemulu.’ niku, Banapas olsu ‘Eninga kandi-angin-meleselé molangli.’ niku ki liiring. Enini kene olsu kene oliu-ni ung te nimbu panjipu kene, “Ba-

napas olsu-ni yambu-lupama liipu tapunjupulu Pulu Yili-nga kongunale teambili. Enini Juda-yambuma liiku tapunjuku Pulu Yili-nga kongunale teangi.” nirimulu. ¹⁰ Ung tilu mindi “Tondulu munduku teangli.” niring. „Krais-nga yambu-talapena sukundu, yambu korupa pupili molemelema liiku tapunjangli.” niring. Kongun kanili na kórunga-ui tembundu numanu sirindu kongunale yandupa ekupu kepe tondulu mundupu kongun kanili teliu.

*2:11-21 Pita-ni Tepa Kis-Sirim Mele Poll-ni Yu
Ung-Mura Sipa Nimba Para Sirim Temanele*

¹¹ Jerusallem yi-aulima-ni nandu “Tellu mele akili kapula tellu. We tekunu mului.” niring, akiliinga-pe penga ,na, kolea-auli Andiyok ,pupu molambu, Pita urum kene yu-ni ulu te tirimele aim aima tepe kis-sirimeliinga ,kanupu kene, yu mulurumna pupu, tepe kis-sirim mele sumbisipu nimbu para sipu ung-mura sirindu. ¹² Jemis-ni ,“Andiyok pai.” nimba, liipa mundurum yima ui naa wangi Pita Juda-yambuma naa molemele yambu-lupama-kene wasie anduku tapú-toku langi nuring. Akiliinga-pe penga Jemis-ni liipa mundurum yi kanuma uring kene ‘Yi-lupa Krais-nga yi molemelema kangi te kopsangi.’ niring yima-kene mundu-mong tenjipa, ‘Teker mele naa kanangi.’ nimba ,Pita, yambu-lupama-kene andupa langi nurum mele akili mundupa kelepa yunu mulurum. ¹³ Kanu-kene Pita-ni ‘Kapula tembu.’ nimba numanale-ni piliipalinga yi kanuma naa oku molangi tirim mele penga uring kene mundupa kelepa ‘Okomele

yima kene numanu tiluna pupili molemulu.' nimba topele-mapele topa ulu gólu tuli te tirim mele 'Andiyok, Juda-yambu 'Krais-nga yambu muluringma, kanuku kene enini kepe Pita-ni topele-mapele topa gólu tuli ulele tirim mele aku-siku manda leku tiringko. Penga enini topele-mapele toku gólu tuli ulele tiring mele Banapassi kanupa kene 'Ui lawa tindu lam. Enini tekemele mele teku konjukumele. Na aku-sipu teambu.' nimba yu-ni kepe aku-sipa lawa tirim.

¹⁴ Kanu-kene enini temani-kaiéliinga ung-sikale-ni 'Teangi.' nilimú mele sumbi-siku naa teku lawa tiring mele kanupuliinga, enini pali kanuku piliiku molangi na-ni Pita-ndu nimbu mele: "Nu Juda-yi te akiliingga-pe Juda-yambuma-ni 'langi nungíndu ung-manima piliiku kene, telemele mele naa teku, Juda-yambu naa molku yambu-lupa molemelemani telemele mele tellu, akiliingga nu-ni yambulupamandu "Juda-yambuma-ni 'ung-manima, piliiku telemele mele aku-siku manda leku teai." nikunu nambimuna mani silluye?" ,nirindu.,

2:15—4:31 “Krais Yesos Mindi Oliunga Tepa Liiliele.” Niku Tondulu Munduku Piliilimili Yambuma Mindi Pulu Yili-ni “‘Ulu-Pulu-Kis Te Naa Pili Yambu Sumbi-Nílima’ Nimbu Kanokur.” Nilimú Ung Te

2:15-21 ‘Yesos Sika’ Niku Tondulu Munduku Piliilimili Yambuma Mindi Pulu Yili-ni Kanupa

*'Yambu Sumbi-Nílima' Nimba Kanolemú Ung Te
(2:11-21 pali kanui)*

15 "Juda-yambu naa molku yambu-lupa molemelemandu Juda-yambuma-ni 'ulu-pulu-kis tili yambuma.' nilimele yambu kanuma oliu Juda-yambuma mólu; Juda-yambuma-ni oliu miringeliingga oliu Juda-yambuma molemulu kanuma 'Krais-nga yambuma molupu kene ung tale piliilimulu mele i-sipa:.'

16 'Te:' 'Moses-ni "Teai!" nimba ung-mani sirimuma yambuma-ni mimi-siku piliiku liiku telemeláliinga Pulu Yili-ni enini kanupa kene eninga ulu-pulu-kísima mundupa naa kelepa, 'numanu sumbi nimba pili yambuma' nimba naa kanolemú.' nimbu piliilimulu.

'Te:' 'Yambuma-ni 'Yesos Krais sika' niku tondulu munduku piliilimili yambuma mindi aku-siku telemeláliinga Pulu Yili-ni enini kanupa kene eninga ulu-pulu-kísima mundupa kelepa, 'numanu sumbi nimba pili yambuma' nimba kanolemú.' nimbu piliilimuluko.

Ung akusele piliipu kene 'Moses-ni ung-mani sirimuma-ni oliu 'Juda-yambuma, kepe manda naa tepa liimba.' nimbu piliipu kene, 'Pulu Yili-ni oliu kanupa oliunga ulu-pulu-kísima mundupa kelepa, 'numanu sumbi nimba pili yambuma' nimba kanupili.' nimbu 'Yesos Krais 'molupa tirim mele, sika.' nimbu tondulu mundupu piliirimulu. 'Moses-ni ung-mani sirimuma mimi-siku piliiku liiku telemele yambumanga aima tilu kepe aku-sipa tembaliingga Pulu Yili-ni yu kanupa kene yunga ulu-pulu-kísima mundupa naa kelepa, 'numanu sumbi nimba pili

yambale' aima naa nimba kanomba.' nimbu piliipuliingga 'Yesos Krais yu mendepulu Pulu Yili-ni oliu-kene aku-sipa temba kupulanumele.' nimbu tondulu mundupu piliilimulu.

¹⁷ "Aku lem, oliu Juda-yambu mare-ni 'Pulu Yili-ni oliu kanupa oliunga ulu-pulu-kísima mundupa kelepa, 'numanu sumbi nimba pili yambuma' nimba kanupili.' akiliingga 'Yesos Krais mendepulu manda tenjimba.' nimbu tondulu mundupu piliamili.' nilimulu ulu kanili-ni oliu i-sipa mele liipa ora silimú: „Oliu-ni "Juda-yambu naa molku yambu-lupa molemelema ulu-pulu-kis tili yambuma molemele." nilimulu mele, oliu kepe , 'Moses-ni ung-mani sirimumani oliu kapula naa tepa liilimú. Krais-ni mindi oliu kapula tepa liimba.' nimbu piliipu Moses-ni ung-mani sirimuma mundupu kelelemuláliingga aku-sipa, ulu-pulu-kis tili yambuma molemulu mele liipa ora silimú, mokerenga lelemú. Aku lem oliu ,Juda-yambuma, ulu-pulu-kis tili yambuma molemulu mele aku-sipa liipa ora silimú mokerenga lelemáliingga 'Krais-ni "Ulu-pulu-kísma teai." nilimú lam.' nimbu piliilimulu kene kapulaye? Aima mólu! „Krais-ni aku-sipa aima naa nilimú..¹⁸ Na-ni ui piliipu kene, 'Moses-ni "Teai!" nimba ung-mani sirimumani na naa tepa liipa, Pulu Yili-ni 'na "mindili nambu." nimbá ulu-pulu-kis te naa pili yambu sumbi niliele molemú kanokur.' nimbá ulu te kapula naa temba.' nimbu tondulu mundupu piliipu Moses-ni ung-mani sirimuma mundupu kilirindu akili penga kelepu 'Moses-ni ung-mani sirimuma-ni na manda tepa liipa Pulu Yili-ni

na 'yambu sumbi niliele.' nimbá ulu-pulele pelemú.' nimbu alsupu Moses-ni ung-mani sirimuma ambulupu piliipu liipu telkanje telka ulu akili-ni 'Na Moses-ni ung-mani sirimuma ui mundupu kilirindu kene tepu kis-sirindu.' nimba liipa ora silka.

¹⁹ „Niker akiliinga ung-pulu te i-sipako: „Yambu te kolemú kene yu nokulemú ulupuluma mundupa kelemú, ulu-pulu kanuma-ni yu kolemáliinga alsupa naa nokulemú aku-sipa mele, Moses-ni ung-mani sirimuma-ni na nukurum kene mimi-sipu piliipu liipu naa tirindelinga ung-mani kanuma-ni Pulu Yili-ni na 'ulupulu-kis naa pili yi sumbi niliele' nimba kanombaliinga ulu-pulele na manda naa sirimeliinga ung-mani kanuma na mundupu kelepu ung-mani kanuma-kene yi kululiele mele mulurundu. Pe ekupu ung-mani kanuma-kene kululi yili moliáliinga Pulu Yili-ni kanupa kaí piliilimú uluma tembundu kona moliu. ²⁰ Krais unjiperana „topa ku toku panjiring kulurum kene, na-kene wasie „toku, ku toku panjiring kulurumbulu. Akiliinga, ekupu na-nanu we kona naa moliu. Krais na-kene tapú-topa molemáliinga yunga kona mululi ulele na-kene pelemú. Akiliinga, kangikundu uluma tepu moliu mele 'Pulu Yili-nga Málale yu sika.' nimbu tondulu mundupu piliipu kene aku-sipu kangikundu uluma tepu moliu. 'Pulu Yili-nga Málale' niker yili yu na numanu monjupa nanga nimba alko topa kulunjurum yili. ²¹ 'Pulu Yili-ni yambuma we kondu kolemú ulele ulu te mólu.' naa nimbu, akili mundupu naa keleliu. Moses-ni

ung-mani sirimuma-ni Pulu Yili-ni oliu ‘yambu sumbi nílima’ nimba kanomba ulu-pulele kapula silkanje Krais we kolka. Yu kulturum ulele-ni ulu te naa telka.” „nimbu Pita-ndu nirindu..”

3

3:1-14 Moses-ni “Teai!” Nimba Ung-Mani Sirimuma Piliiku Liiku Telemele Ulele Kene, ‘Krais-ni Sika Oliunga Nimba Tinjirim.’ Nimbu Tondulu Mundupu Piliilimulu Ulele Kene, Ulu Kanuselenga Ung Te (2:14 pulu monjukunu kanui)

¹ Eni „Krais-nga yambu, Gallesia molemele yambu-wiliema, na-ni ui Yesos Krais unji-perana ‚toku, ku toku panjiring kulurum mele nimbu sirindu kene eni aima piliiring yambuma, eni yambu nae-ni numanuma tepa bemba sipa liipa lu sirimuye? ² Na-ni eni ung aima tiluele walsipu piliambu: Mini Kake Tiliele ‚kupulanum nambulkarenga, liiringiye? „Moses-ni, “Teai!” nimba ung-mani sirimuma piliiku liiku teng panjiku tiringelinga Mini Kake Tiliele liiring, mola ‚temani-kai topu sirindele piliiku kene, ‘Sika’ niku tondulu munduku piliiringeliinga liiringiye? ³ Eni ‚nambulka ung te piliiku kene, aku-siku wilie pulimeléye? Ui-pulu-pulu ‚Krais-nga yambuma molamili. Pulu Yili-ni oliu kanupa kai piliipili.’, niku kene Mini Kake Tiliele liiring kanili, pe ekupu ‚numanu topele toku, eni-enini eninga tonduluma-ni ‚Moses-ni ung-mani sirimuma piliipu liipu tepu kene, aku-sipu molamili.’ niku piliilimiliye? ⁴ ‚Krais sika.’ niku tondulu munduku piliiring kene, ‚Mini

Kake Tiliele-kene, ulu ‚kaí aku-sipa, mare eni-kene wendu urum akuma we wendu urumye? ‘Ulu ‚kaí‘ akuma we wendu urum lam.’ nimbu kanokur. ‘Ulu kaí akuma wendu urum kene penga ‘Moses-ni ung-mani sirimuma-ni oliu tepa liimba.’ niku piliiku liiring, akili aima kis.’ nimbu piliiker. ⁵ ‘Moses-ni, ung-mani sirimuma piliiku liiku telemeláliinga Pulu Yili-ni yunga Minéle eni sipa, eni molemelena ulu-tondulumu telemúnje, mola ‚temani-kaiéle, piliiku kene ‘Sika’ niku tondulu munduku piliiringeliinga aku telemúye?

⁶ ‘Pulu Yili-nga bukna Eprayam-ndu nimba molemú mele, piliiku piliai:

“Pulu Yili-ni yu-kene “Tembu.” nirim mele
Eprayam-ni ‘Sika temba.’ nimba
tondulu mundupa piliirimeliinga
kanupa kene

Pulu Yili-ni “Yu yi sumbi-niliele.”
nimba kanurum.” *Ui-Pulu-Pulu 15:6*
nimba molemú. ⁷ Akiliinga, ‘‘Temani-kaiéle
sika.’ niku, tondulu munduku piliilimili yambuma Eprayam-nga kangambulama molemele.’
niku piliai. ⁸ Penga wendu ombá mele Pulu Yili-nga bukna ui mulurum. Penga Juda-yambu
naa molku yambu-lupama-ni ‘Sika’ niku ton-
dulu munduku piliingéliinga Pulu Yili-ni enini
kanupa kene ‘Eninga ulu-pulu-kísima mundupu
kelepu, ‘numanu sumbi nimba pípili molemele
yambuma’ nimbu kanombu.’ nimbá mele Pulu
Yili-ni ui Eprayam-ndu temani-kaiéle pembá
mele topa sipa kene nimba mele:

‘ ‘Nu-ni kalku liini yi te-ni tembaliinga

ma-koleana yambuma pali membu
pemba kene
molku kunjingí.”

nirim.’ *Ui-Pulu-Pulu 12:3, (18:18), 22:18, 26:4*
nimba molemú.⁹ ‚Pulu Yili-ni aku-sipa
Eprayam-ndu nimba panjurumeliinga, yu-ni
‘Pulu Yili sika.’ nimba, tondulu mundupa
piliirim yi Eprayam Pulu Yili-ni membu panjipa
tepa kunjurum kene yandupa-yandupa ‚Pulu
Yili sika.’ niku, tondulu munduku piliilimili
yambuma kepe Eprayam-kene wasie membu
panjipa tepa konjulimúko.

10 ‚Moses-ni, ung-mani sirimuma piliipu liipu
teng panjipu temulú kene ‚Pulu Yili-ni olius ‘ulupulu-kis naa pili yambu sumbi-nílima’ nimba
kanomba.’, niku tondulu munduku piliilimili
yambuma Pulu Yili-ni ‘Mindili noku molku kis-
sangi.’ nimbá. Pulu Yili-ni aku nimbáliinga
ung te piliipu kene aku niker akili Pulu Yili-nga
bukna molemú. Akili i-sipa mele:

‘Ung-manima molemú buk ‚Moses-ni turumeli-
inga,

ung-mani aima pali taki-taki piliiku liiku
teng panjiku naa tingí yambuma
Pulu Yili-ni ‘Mindili noku
molku kis-sangi.’ nimbá.’ *Ung-Manima*
27:26

nimba molemú kanili. 11 ‚Pulu Yili-nga bukele-ni
nimba mele:,’

‘Pulu Yili ‘sika’ niku,
tondulu munduku piliingí yambuma mindi
Pulu Yili-ni kanupa ‘yambu sumbi-
nílima’

nimba kanomba yambu kanuma
 mindi
 kona molku konjuku mindi pungí.'

Apakak 2:4

nimba molemú mele piliipu kene ‚Moses-ni, ung-maní sirísuma piliiku liiku tingí yambuma Pulu Yili-ni kanupa eninga ulu-pulu-kísima mundupa kelepa, ‘numanu sumbi-nimba pili yambuma molemele.’ nimba kanomba kupulanum te aimá naa lelemú mele aimá sumbi-sipu piliilimulu.

12 ‚Moses-ni, ung-maní sirísuma-ni ‚oliu tepe liimba.’ niku, mindili-siku lombulku tingí ulele kene, ‚Krais-ni oliu tepe liimba.’ niku, tondulu munduku piliingí ulu-sele walsekale liiku tere leku kapula naa tingí. Aimá manda mólu!

‘Moses-ni ung-maní sirísuma tingéliinga ung te Pulu Yili-nga bukele-ni nimba mele:’

‘Ung-manima aimá pali
 taki-taki mimi-siku piliiku liiku teng panjiku
 tingí yambuma mendepolu
 aku-siku tingéliinga molku konjuku mindi
 pungí.

‘Ung-maní mare walsekale kepe
 munduku kelku naa tingí kene
 naa molku konjuku mindi pungí.’ *LLi-pai 18:5*

nimba molemú kanili.

13 ‚Pulu Yili-ni, ‘Krais mindili nomba mindili
 sipa mulupili.’ nirim-na yu sika mindili nomba
 numanuna buni tipili mindili sipa mulurum
 ulu akili-ni, Krais yu-ni oliu ‚Juda-yambuma,
 ung-manima-ni ‘Mindili noku molku kis-sangi.’
 nilimú kupulanum-na wendu liinjirim. ‚Pulu

Yili-ni Krais tepa kis-sirimeliinga ung-pulu te
 Pulu Yili-nga bukele-ni nimba mele: „
 ‘Yambu unjina ola ‘Kolangi.’ niku
 ku toku panjilimele yambuma „Pulu Yili-ni,
 ‘Mindili noku molku kis-sangi.’
 nimbá.’” *Ung-Manima 21:23*

bukna nimba molemú akiliingga Krais yu unjina „toku, ku toku panjiringeliinga Pulu Yili-ni Yesos “Mindili noku molkunu kis-sani.” nirimko.
¹⁴ ‘Pulu Yili-ni Eprayam-ndu „Nu-ni kalku liini yi te-ni tembaliinga ma-koleana yambuma pali molku kunjingí.’ nimba, „nimba panjurum ung kaiéle Krais Yesos-ni ulu te tenjimbaliinga Juda-yambu naa molku yambu-lupama kene pípili.’ nimba „Pulu Yili-ni ui, oliu kolea-kísina molupu kis-sipu mindi pulkumula kupulanum-na wendu liirim. ‘Mini Kake Tiliele liangi simbu.’ nimba, nimba panjurum akili ‘‘Krais-ni tinjirimele oliunga nimba tepa liimbandu tinjirim.’’ niku, tondulu munduku piliingí yambuma-ni aimaa liangi!’ nimba „Pulu Yili-ni, aku-sipa nirim.

3:15-27ekendu Moses-ni Pulu Yili-nga Ung-Mani Sirimuma-ni Pulu Yili-ni “Tembu.” Nimba, Nimba Panjirimele Manda Topa Mania Naa Mundumba Ung Te (2:14 pulu monjukunu kanui)

¹⁵ Angmene, ‘Ung te na-ni ung-bo tonjumbale sumbi-siku piliangi.’ nimbu, ya ma-koleana yambuma-ni ulu te telemele mele eni piliilim-ilále nimbu sambu. Yambu tale-ni “I-sipu i-sipu teambili.” nikulu anju-yandu ung te niku panjikulu mi lelembélé kene penga niku panjikulu mi lelembélé ung kaniliingga yambu te-ni

ung te wendu naa liilimú, yambu te-ni ung te sukundu naa mundulimú. Sika ung akili makoleana yambusele-ni mindi niku panjilimbele akiliinga-pe penga ung kanili yambuselenga te-ni alowa naa telemú. Ungele niku panjikulu mi lelembele mele aku-sipa we pelemú. „Akili manda monjupa, Pulu Yili-ni Eprayam-kene tirim mele liipa ora silimú.”¹⁶ Pulu Yilinga bukele-ni nilimú mele i-sipa: “Pulu Yili-ni “Tembu.” nimba, nimba panjurum ungele „oliu Juda-yambumanga anda-kolepa, Eprayam kene Eprayam yu-ni kalupa liimbale kene akuselendu nimba, nimba panjurum.” nilimú. „Yi, kalupa liimbale.” nilimú kanili „yi, tiluelendu mendepolu nilimú. “Nu-ni kalkunu liinéle.” nilimú. “Nu-ni kalku liiníma.” naa nilimú. Yambu pulelendu naa nilimú, tiluelendu mendepolu nilimú. „Yi, tilu akili „Pulu Yili-ni makó turum yi-nuim, Kraisele.

¹⁷ Ung niker ilinga pulele i-sipa mele: „Pulu Yili-ni “Aku tiní kene na-ni i-sipu i-sipu tembu.” nimba, „nimba panjipa mi lirim ung kanili yu kórunga kumbi-lepa wendu ombo pirim. Ung kanili ui we pípili penga punie po-andret kelepa teti ombo purum kene „Moses-ni, “Teai.” nimba ung-mani sirimuma wendu urum. „Ung-mani kanuma sika penga aelepa wendu urum akiliinga-pe, Moses-ni ung-mani sirimuma-ni Pulu Yili-ni ui nimba panjipa mi lirim ungele manda naa topa mania mundumba, Pulu Yili-ni ui nimba panjurum ungele we pemba mindi pelemú, ung akiliinga kongunale mania manda naa pumba.¹⁸ Yambuma Pulu Yili-ni “We

simbu.” nirim melale liingíndu Moses-ni ung-mani sirimuna piliiku liiku teku kene méle kanili liilkemelanje Pulu Yili-ni „We simbu.” nimba, „nimba panjurum ungele ‘Sika’ niku tondulu munduku piliikuliinga kapula naa li-ilkemela. Akiliingga-pe Pulu Yili-ni Eprayam-ndu “We simbu.” nirim melale ung nimba panjurum ungele-ni mindi méle akili yu we simbandu yu-yunu piliipa kene makó turum. „Eprayam-ni ulu te tirim-na kanupa kaí piliipa kene Pulu Yili-ni “Simbu.” naa nirim. Yu-ni yunu piliipaliinga aku-sipa nimba panjurum.,

¹⁹ „Pulu Yili-ni “We simbu.” nirim melale simbandu yu-ni ui nimba panjurum ungele piliipa kene simba, lem Moses-ni “Teai!” nimba ung-mani penga sirim-ma nambimuna sirimuye? Ung-mani kanuma-ni nambi telemúye? Aku, “Yambuma ulu-pulu-kísima telemele mele piliangi liipu ora sambu.” nimba kene Pulu Yili-ni „I-siku teai. I-siku naa teai.” nimba, ung-mani kanuma sirim. „Pulu Yili-nga ung-mani Moses-ni yandu nimba sirim-ma naa pelkanje ulu-pulu-kísima tepu kene ‘Tepu kis-símulu.’ nimbu naa piliilkumulá.” Akiliingga-pe ‘Ung-mani kanuma kamu pípili.’ nimba Pulu Yili-ni naa sirim. Eprayam-ni kalupa liimbalendu ui nimba panjurum kalupa liimba yi kanili ‘ui naa upili ung-manima-ni yambuma nukupili. Yu ombá kene ung-manimanga tondulale mania pupili.’ nimba Pulu Yili-ni ung-mani akuma sirim. Pulu Yili-nga ung-manima mulú-koleana angkellama-ni yandu niku sinjiring, yambuma kene mulú-koleana angkellama kene suku-singina yi te-ni

yandu liirim kene kamu pirim. „Suku-singina yi nikem akili yu Moses..²⁰ Pulu Yili-ni ungmanima simbandu suku-singina yi te-ni molupa nimba sinjirim, Pulu Yili-ni yu-yunu yambumandu sumbi-sipa ung te naa nirim, akiliingape yi te-ni yu-yunu ung te sumbi-sipa nimba panjilimú kene suku-singina yambu te-ni ulu te naa tenjilimú. Pulu Yili yu yi tiluele mindi molupa yu-ni yunu sumbi-sipa Eprayam-kene ung te nimba panjurum. Yambu te-ni suku-singina ulu te naa tinjirim.

3:21-27ekendu ‘Oliu Penga Krais-nga Yambuma Molamili.’ Nimba Moses-ni Ung-Mani Sirimuma-ni Oliu Ui Nokupa Mani Sirim Ung Te (3:14-26 pali)

²¹ Pulu Yili-ni aku-sipa tirim-na „Moses-ni Pulu Yili-nga, ung-mani „sinjirim ungma, kene Pulu Yili-ni „Eprayam-kene, nimba panjurum ungele kene anju-yandu ele-tu mele molembeleye? Aima mólu! „Pulu Yili-ni numanu tale piliipalinga “Ung-manima-ni enini nukupili sambu.” naa nirim.., Yambuma kona molku mindi puli ulu-pulele kapula simba ung-mani te pelkanje Pulu Yili-ni ung-mani kanuma piliiku liiku telemele „yambuma, kanupa ‘yambu, sumbi-nílima’ nimba kanolka. Penga oliu aku-sipa ung-mani pelkale piliipu liipu tepu kene numanu sumbi nimba pílima molupu kene yunga kumbikerina kapula pupu molkumula. ²² Akiliinga-pe aku-sipa tili ung-mani te naa pirim, naa pelemú. Pulu Yili-nga bukele-ni i-sipa mele nilimú: “Ma-koleamanga pali yambuma pali

ulu-pulu-kísimani ka silimú ‚kene,,
ka-lkuna mele pelemelé.

Takara toku manda naa pulimelé.”

nilimú. „Pulu Yili-nga ung-manima pelemáliinga
aku telemú., „Moses-ni ung-mani sirimuma-
ni yambuma nokulemáliinga ulu-pulu-kísimani
yambuma pali ka silimáliinga pulele i-sipa
mele:, Pulu Yili yu-ni nimba panjurum melale
‘yambuma-ni liingíndu Yesos Krais-ni tinjirimele
‘Aima sika.’ niku tondulu munduku piliingí yam-
buma sambu liangi akiliinga ulu-pulu-kísimani
yambuma pali ka sipa pípili.’ nirim. Simba liingí
kupulanum te-lupa mólu.

²³ Yesos-ni oliunga nimba tinjirim mele ‘Sika’
nimbu tondulu mundupu piliilimulu kupulanu-
mele ui wendu naa upili Moses-ni „Pulu Yili-nga,
ung-mani sirimuma-ni oliu ‘Mong liingéliinga
mindili nangi.’ nimbándu ka mele sirim. Yesos-
ni penga omba oliunga nimba tinjirim mele
‘Sika’ nimbu tondulu mundupu piliilimulu ulele
lku-ki mele lepa, ung-mani ui pirim-manga ka-
lkuliinga llok mele pirim kanili penga kima
liinjimbaliinga Moses-ni ui ung-mani sirimuma-
ni aku tirim. ²⁴ „I-sipu mele niker:, ‘ ‘Pulu
Yili-ni oliunga ulu-pulu-kísima mundupa kelepa,
numanu sumbi nimba pili yambuma molemele.’
nimba kanupili.’ niku ‘Krais-ni oliunga nimba
tinjirim mele ‘Sika’ niku tondulu munduku pil-
iangi.’ nimba Krais ui mana mania naa upili
Pulu Yili-ni ‘Ung-manima-ni oliu nukunjupili.’
nimba, ung-manima sirim. ²⁵ Akiliinga-pe ekupu
oliu Krais-ni tinjirim mele ‘Sika’ nimbu tondulu
mundupu piliipu molomulú ulu akili wendu

urum lelemáliingga „Pulu Yili-nга, ung-mani ui sirimuma-ni oliu naa nokulemú.

*3:26—4:7 Pulu Yili-nга Kangambulama
Molemulu Mele Ung Te*

²⁶⁻²⁷ Ekupu Krais Yesos-ni „penga tinjirim mele, ‘Sika „oliunga nimba tinjirim.’“ niku tondulu munduku piliilimili ulele-ni eni pali ekupu Pulu Yili-nга kangambulama mulungí kupulanumele akisinjirim-na aku-siku molemele.

Eni no liiring ulu kanili-ni Krais kene eni kene yambu tiluele mele muluringma pali Krais, „mulumbale mele,“ pakuringeliingga sika Pulu Yili-nга kangambulama molemele.

²⁸ Eni pali Krais-nга yambu molemelema, Juda-yambuma lupa, Juda yambu naa molemele yambuma lupa mólu;

ku-moni naa liiku we kendemande-kongun tinjili yambuma lupa, we molemele yambuma lupa mólu-ko;

yima lupa, ambuma lupa mólu-ko;

ekupu eni pali Yesos Krais-nга yambu-talape tiluele mendepolu molemeláliingga yambu lupalupama naa molemele. ²⁹ Eni Krais-nга yambuma mulúngi lem eni Eprayam-ni kalupa liirim yambuma molemeleko; Pulu Yili-ni ui „Eprayam-ni kalupa liimba yambuma, “Simbu.” nimba, nimba panjurum melale eni wasie liingí.

4

4:1-7 Oliu Kendemande-Yambuma Mele Mulu-rumulu Akiliingga-pe Ekupu Pulu Yili-nга Kangam-

*bulama Molupu, Yunga Moya-Mélema Liimulú
Yambuma Molemuláliinga Ung Te (3:26—4:7 pali)*

¹ „Kangambulama kene moy-a-mélema liingí yambuma kene, akumandu nimbú nikerale i-sipa mele: Kang te-ni yunga lapanga moy-a-mélema sika liilimú, akiliinga-pe ui yu kelú kene lapanga kongun kendemande-yambu te mele molemú. Lapanga mélema pali sika yunga, akiliinga-pe yu kang kelále mindi molemú kene naa liilimú. ² Lapale-ni ‘penga yu moy-a-mélema liipili.’ nimba, nimba panjilimú enale ui wendu naa upili “Kangale kene mélema kene nukupili.” nimba makó tolemú yambumanga ungma mindi piliipa molemú. ³ Oliu aku-sipako. Oliu kangambula kelúma mulurumulu kene ma-kolealiinga ung-mani mola ulu-pulu lupa-lupa wema-ni mindi ‘Nanga kendemande-kangambulama.’ nimba oliu nokupa, kangimaní ulu-puluma temulú mele mani sirim.

⁴ Akiliinga-pe Pulu Yili-ni ui yu-yunu numanale-ni piliipa makó turum enale wendu urum kene yu-ni yunga Málale liipa manamania mundurum akili ‘Moses-ni “I-siku teai! I-siku naa teai!” nimba, ung-mani sirimumana nukurum yambu-talapena suku ambu te-ni mirim. ⁵ ‘Moses-ni, ung-mani sirimumana nokulemú yambu kanuma alsupa naa nukupili. Enini we molku, ‘Moses-ni, ung-mani sirimuma kapula naa piliiku liiku telemeláliinga mindili noku kulungí kupulanum-na wendu oku, nanga ‘kangambulama, molku nanga moy-a-mélema liangi.’ nimba yu-ni yunga Málale ‘Eninga nimba yunga memale onde

lepa, alko topa kulunjupili.’ nimba manamandu liipa mundurum. ‘Málale-ni oliunga nimba tenjimba ulele-ni oliu tepe liipa kapula molomulú kupulanumemele akisinjipili.’ nimba yu oliu mana-yambuma molemuluna liipa mundurum.

⁶ Penga Pulu Yili-nga kangambulama molemulu-na yu-ni yunga Málale-nga Minéle oliunga numanumanga suku, ‘Mulupili.’ nimba, liipa mundunjurum. Mini akili Pulu Yili-ndu “Tata. Nanga Lapa.” nilimú Minéle. „Pe oliunga numanumanga molupa “Tata; nanga Lapa.” nilimú kene, piliipuliinga ‘Oliu yunga kangambulama.’ nimbu piliilimulu., ⁷ Pulu Yili-ni aku tirim-na ekupu mélema-ni ui eni nukurum kene méle kanumanga kendemandeyambuma muluring mele naa molemele; Pulu Yili-nga kangambulama molemele. Pe yunga kangambulama molemeláilinga yu-ni “Nanga nosiliu mélema eni penga moyá-mélema liangi simbu.” nirim.

4:8-20 Poll-ni Gallesia Yambuma Kondu Kolupa Numanu Pulele Liipa Mundurum Ung Te

⁸ Ui Pulu Yili naa piliiku yunga yambuma naa molku kene, Pulu Yili naa mulurum méle wema liiku ‘oliu nokolemele pulu yima’ niku liiku angnjiku popu turing mélemanga kendemandekongun aimá mindili siku tinjiring. ⁹ Akiliinga-pe ekupu Pulu Yili piliiku bi siku yunga yambuma molemele. Akiliinga-pe sika akili mólu. Na-ni i-sipu niambu: Pulu Yili-ni nimba mele: “Eni na piliiku bi siku nanga yambuma molangi.” nirim. Aku lem ekupu *aku-siku*, molemele

mele nambimuna munduku kelku bulu siku, tondulu naa puli ung-manima nambimuna alsuku piliiku molemeleye? 'Ulu kanuma-ni oliu alsupa nukupili. Oliu ulu kanumanga kende-mande tinjili yambuma alsupu molomulú kene kapula.' niku piliilimiliye? ¹⁰ Juda-yambuma-ni kóru tengatenga niku ena tengatenga kóru mulungí walema kene, kaliimbu konanga ke tomba enama kene, punie konanga wendu ombá enama kene, langi tepa tomba kene pulu monjuku sukundu liingí enama kene, ena kanuma wendu ombá kene ulu mare piliiku tingí mele Pulu Yili-ni ‚Moses nimba sirim kene piliipaliinga Isrel-yambuma ung-mani sirimeliinga piliiku liiku telememele, mele ‚eni Krais-nga Gallesia-yambuma ‚Pulu Yili-ni oliu kanupa kaí piliipili.’ niku, piliiku liiku telememele. ¹¹ ‚Aku-siku telemeláliinga, ‚Na-ni eni mindili sipu mani sirindu mele we tirindunje. Eni-kene kongun tirindele we mania pumba. Na eni mani sirindu ungma munduku kelku ui piliiku tiring mele alsuku piliiku tingí kene kis lemba.’ nimbu na aimaa mini-wale mundukur.

¹² Angmene, na-ni eni aimaa tondulu mundupu mawa tepu kene, na ui ‚Moses-ni ung-mani sirimuma mundupu kelepu, eni Juda-yambu naa molku yambu-lupa muluringma-ni Moses-ni ung-mani sirimuma naa piliiring mele mulurundiinga ekupu na ‚Krais-nga ungele piliipu, moliu mele eni aku-siku piliiku molai.

„Na eni-kene mulurundu kene, eni na-kene ulu te teku kis naa siring. ¹³ Eni piliilimili, na kuru te turumeliinga ui kumbi-lepu eni

muluringna ombu temani-kaiéle topu sirindu. ¹⁴ Nanga kangiele tondulu naa purumeliingga eni buni sirindu akiliingga-pe eni na kanuku kis piliiku bulu naa siku, na munduku naa kiliring. Pulu Yili-ni angkella te eni molemelena liipa mundulka kene "Wasie molamili ui." nilkimela mele, mola Krais Yesos yu olka kene "Wasie molamili ui." nilkimela mele na aku-siku "Wasie molamili ui." niring. ¹⁵ Ui na-kene numanu siku "Papu únu. Wasie molamili ui." niring mele ekupu nambi telemúye? Na-ni aima sika nimbu siker: 'Ui na eni-kene wasie mulurumulu kene „mélé aima numanu lakuku munjuring mélema na silkimela. Nanga mong te kis lelkanje 'Na liipu tapunjamili.' niku, eninga mong te ukuku na silkimela.' nimbu niker. ¹⁶ Aku lem, na-ni eni ung-sikama nimbu sikereliingga ekupu na eninga ele-túli moliuye?

¹⁷ 'Yi Moses-ni ung-mani sirim kanuma piliiku teai.' niku mani silimele, yima-ni "Oliunga ungma aima piliangi!" niku tondulu munduku mani silimele akiliingga-pe aku telemele ulele 'Eni liipu tapunjamili.' niku naa telemele. 'Eni ,na kene nanga angnipilima kene, tapú-toku naa molangi.' niku pipi siku, 'Enini-kene mendepolu tapú-toku molku eninga ungma mindi numanu kimbu-siku piliiku liiku molangi.' niku aku-siku tondulu munduku mani silimele. ¹⁸ Na eni-kene naa moliu kene yi lupa mare-ni 'Eni liipu tapunjamili.' niku tondulu munduku 'Pulu lipili. Tapú-topu molamili.' nilkimelanje kapula. Yi mare-ni aku-siku oku taki-taki telkemelanje papu akiliingga-pe yi mare-ni oku 'Oliunga ungma pili-

iku liangi.' niku gólu toku tondulu mani silimele akili kis. ¹⁹ Nanga numanu monjiliu kangambulama, ambuma kangambula mingíndu mindili nolemele mele 'Eni Krais yu-mele molku yunga ungele mendepolu piliiku liiku molangi.' nimbu na aku-sipu alsupu mindili nokur yili molupu kene, ²⁰ 'Na eni-kene molupu eninga kumbikerima kanupu ungma kerina sumbi-sipu nimbu silkanje papu. 'Pepá mindi topu mundukurele layere kapula mólu..,' nimbu molupu, 'eni ekupu telemele mele piliipuliinga, 'Na-ni eni nambisipu liipu tapunjumbunje.' nimbu piliikereliinga eni aim aima kondu tepe buni tekem.

4:21—5:1 Eprayam-nga Ambu Aka Kene Sera-sele Muluringli Mele Ung-Eku Te (3:15 pulu monjukunu kanui)

²¹ Eni 'Juda-yambumanga, ung-manima-ni oliu nukupili.' nilimele yambuma, ung-mani kanuma-ni nilimú mele eni naa piliilimiliye? Na niku sai. ²² 'Pulu Yili-nga, bukele-ni nimba mele: "Eprayam-ni kang tale mirim, te kongun we tenjipa méle kaluli te naa liili kendemande-ambale-ni mirim; te mindili te naa nomba we mulurum ambale-ni mirim." nilimú. ²³ Kendemande-ambale-ni kang minjirimele kangambulama melemele mele aku-sipa we minjirim. Akiliinga-pe we mulurum ambale-ni yunga kang minjirimele we naa minjirim. Pulu Yili-ni 'Yunu-ni kang te menjimba.' nimba, nimba panjurumeliinga kang kanili minjirim.

²⁴ Ambu kanusele Pulu Yili-ni ung tale nimba panjipa mi lirim-sele mele manda monjukulu,

elsele-ni tiringli uluselenga ung-eku te pelemú. „Kendemande-ambu Aka yu Pulu Yili-ni ung te mulú Sainai-na nimba panjipa mi lirim ungele mele molemú. Ung kanili „Pulu Yili-ni Moses sirimele-ni, kongun kendemande-yambu mulungí kangambulama melale.²⁵ Ambu Aka kene kolea Arebia akuna mulú Sainai polemú mulále kene akuselenga ung-pulele tiluele. Kolea-auli Jerusallem molemele yambuma „Moses-ni mulú Sainai-na molupa ung-mani sirimu-manga, kongun kendemande tinjili yambuma mele molemeláliinga Jerusallem ekupu lelemú akili mulú Sainai pulurum mele aku-sipako lelemú. „Jerusallem akuna molemele yambu-manga anum yu kongun kendemande tinjili ambale mele kanili.“²⁶ Akiliinga-pe Jerusallem te mulú-koleana lelemáliinga yambuma mindili te naa noku we molemele. Jerusallem akili oliu „Krais-nga yambumanga, anum.²⁷ Aku nikere-liinga pulele „Pulu Yili-nga, bukna molemú ung kanili i-sipa mele:

“Ambu-waengonale,

kangambula naa mellu ambale, nu nu-manu siyo.

„Kangambula mingíndu mindili nolemele
mele

kangambula naa melláliinga,

mindili naa nollu ambale,
nu numanu kaí pípili konana niku

tondulu nangale toku niyo.

Ambu-waengonale-ni

melemú kangambulama aima pulele,

we-ambumanga kangambulama koltale
mele,
akiliinga aimā numanu siku aku tiyo.”

Asaya 54:1

nimba ungele aku-sipa bukna molemú.

²⁸ Angmene, „Pulu Yili-ni Eprayam-ndu, “Wendu ombá.” nimba, nimba panjurum mele akili wendu ombándu „Eprayam-ni yunga kang, Aisak mirim, aku-sipa mele, ekupu eni „Krais-nga yambuma, kepe „Pulu Yili-ni “Wendu ombá.” nimba, nimba panjurum ungele wendu ombándu „Pulu Yili-nga, kangambulama molemeleko. ²⁹ „Eprayam-nga kangsele, miringli kene kangambula we melemele mele mirim kangale-ni „Pulu Yili-nga, Minéle-nga tondulale-ni mirim kangale tepa kis-sipa mindili sirim. Ekupu aku-sipako „Moses-ni ung-mani sirimumanga kendemande-yambuma-ni Krais-nga yambuma mindili silimele.” ³⁰ Akiliinga-pe ambu kanusele kene elsengla kangsele kene Pulu Yili-nga bukele-ni nambulka nilimúye?

„I-sipa mele nilimú: „

„Pulu Yili-ni Eprayam-ndu nimba mele: „

“Kongun kendemande ambaliinga málu kangale
kene

we molemú ambaliinga málu kangale kene
lapanga moyá-mélema

moke teku aimā naa liangli akiliinga
kendemande-ambale kene málale kene
kamu makurui.” „nirim.” *Ui-Pulu-*

Pulu 21:10

nimba molemú kanili. ³¹ Akiliinga, angmene, oliu kendemande-ambaliinga kangambulama

naa molemulu; ka-kongun naa tepa we mulurum ambaliinga kangambulama molemulu.

**Kolomong-Auli 5-6sele Krais-ni
Oliu 'Ka-Lkuna Mele Naa Peku
We Molangi.' Nilimú Kene Mini
Kake Tiliele-ni Oliu
Kupulanum-na Pupu Telemulu
Mele Liipa Sumbi Sirim; Oliu
Yambuma Liipu Tapunjupu Tepu
Konjulimuluko, Akumanga Ung
Mare**

5

*5:1-15 Oliu Méle Te-ni Pipi Sipa Naa Nukupili
Aima We Molemulu Mele 'Aku-Sipu We Molamili.
Méle Te-ni Alsupa Nokupa Ka Naa Sipili.' Nimbu
Mimi-Sipu Kanupu Molamili Ung Te*

¹ „Ka-kongun naa tepa we mulurum ambaliinga kangambulama molemuláliinga pulele i-sipa mele: „Moses-ni ui “Ulu mare teai!” nimba “Mare naa teai!” nimba ung-mani sirimuna-ni oliu naa nukupili., We kapula molangi.’ nimba Krais-ni oliu wendu liirim. Akiliinga, ‘Méle te-ni alsupa naa ambulupili; méle-tenga kendemande-yambuma naa molupu, we mende-polu molamili.’ niku tondulu munduku molai.

² Nanga ungma aima piliai! Na Poll-ni enindu nimbu mele: Eni „Krais-nga yima, eninga kangi te ‘kopsiku wendu liinjangi.’ níngi lem Krais-ni ‘yambumanga’ nimba liipa tapunjupa tepe

liirim ulele-ni, eni laye-kolte kepe aimaa ulu te manda naa temba.³ Alsupu yimandu pali sumbisipu niker: ‘Pulu Yili-ni na kanupa kaí piliipili akiliinga, kangi te kopsinjangi.’ ningí yima ‘Moses-ni, ung-mani sirimuma-ni pali nokumba. ‘Kangi te kopsai.’ nilimú ung-manele piliiku liiku telemele yima-ni ung-mani kanuma pali piliiku tingí kupulanumele akisingí.⁴ Eni ‘Krais-nga Gallesia-yambumanga yambu mare, ‘Pulu Yili-ni oliu kanupa kene oliunga ulu-pulu-kísima mundupa kelepa, ‘numanu sumbi nimba pili yambuma’ nimba kanupili.’ niku ‘Moses-ni, ung-mani sirimuma piliiku liiku telemele yambuma Krais munduku kelku, yu-kene tiluna muluring kupulanumele pipi siring; Pulu Yili-ni yambuma we kondu kolemú ulele-ni eni naa nokulemú.⁵ Akiliinga-pe ‘Moses-ni ung-mani sirimuma-ni manda naa liipa tapunjupa tepe liimba.’ nilimulu yambuma,, Mini Kake Tiliele-ni ‘‘Sika’ nimbu tondulu mundupu piliilimulu ulele tondulu pupili.’ nilimáliinga ‘penga yambu sumbi-nílima sika molomulu.’ nimbu numanu sipu nokupu molemulu.⁶ Krais Yesos kene tapútopu molemulu kene yambuma kangi te kopsilimele mola kangi te naa kopsilimele ulu akumani ulu te naa telemú. ‘Yu sika oliunga liipa tapunjupa tepe liiliele.’ niku, tondulu munduku piliiku kene yambuma numanu monjulemele ulu kanili mindi sika tondulu te pelemú.

⁷ ‘Méle kaluliele liamili.’ niku, kir-kiri likiku lkisiku kunjuring. Pe ekupu yambu naenii ombo eni ‘Krais-nga, ung-sikale piliiku liiku telemele kupulanumele pipi silimúye?’⁸ Nae-ni

eni ung-kundi topa “Ung-sikale munduku kelai.” nimuye? Ekupu eni numanale-ni piliilimili ulu akili ‘Nanga yambuma molangi wai.’ nimba walsilimú ‘Pulu, Yili-ni ‘Aku-siku piliangi.’ naa nilimú. ⁹ ‘Piliai! Ung-eku toku,

“Plawana tepa auli mundulimú méle yis kanili
plawana mundulimele kene
yis aimá wallú-kolte-ni
plawama tepa auli mundulimú.”

„nilimele kanili. Eni ung-kundi tolemú yi gólu tuliele aku-sipa telemú. Yu eni-kene molemáliinga eni pulele yunga ungele lumbili pulkimela.. ¹⁰ ‘Akiliinga-pe, eni sika tingí mele tondulu mundupu piliiker. Auliele-kene tapú-topu molemuláliinga yu-ni eni liipa tapunjupa tepa liimba kene na-ni ui ung-sikale nimbu sirindu ungma ‘Sika’ niku kene ‘ung te-lupa numanu kimbu naa singí.’ nimbu tondulu mundupu piliiker. Yi te-ni eni tepa bemba sipa ung-kundi tolemú akili naenje, na naa piliiker akiliinga-pe aku telemáliinga sika méle kaluli kisele liimba.

¹¹ Angmene, ‘Poll-ni “Kangi te kopsangi.” nilimú.’ nilimele mele sika aku-sipu na-ni niliu lem nambimuna ‘Juda-yambuma-ni, na mindili silimeleye? ‘Aku-sipu nilkanje na mindili silimele kupulanum te naa lelka..’ Aku-sipu nilkanje ‘Krais, unji-perana ‘oliunga nimba kulunjurum mele nimbu siliu, ung akili piliiku kene ‘Juda-yambuma-ni, piliiku kis piliiku ‘na buni te naa silkimela.. ¹² ‘Yi kanuma-ni eni ‘Krais-nga yambuma, niku bemba siku “ ‘Pu’u Yiliinga yambuma molangi.’ niku kangi te kopsiku

wendu liangi.”, nilimele yima-ni eninga kangi te kopsiku kene eninga láka kamu tolkemelanje papu.’ nimbu piliiker.

¹³ Nanga angmene, Pulu Yili-ni ‘Ung-mani te-ni eni nokupa buni te naa sipa eni naa ambulupili aimá we molangi.’ sika ui nimba eni makó turum akiliingga-pe eni penga niku mele: ‘Kapula, ung-mani te-ni oliu naa nokulemú, we molemuláliinga ui-we-numanuma-ni ulu pili-kumulu mele teamili.’ niku ulu-pulu-kísima naa teai. ‘Ung-mani te-ni oliu naa nokulemú.’ niku eni-enini anju-yandu numanu monjuku eni liiku tapunjuku kongun tenjai. ¹⁴ Moses-ni ung-mani sirim pelemúmanga pali ung-mani tiluele-ni liipa tere lelemú, akili i-sipa mele:

‘Eni-enini lupa-lupama numanu monjuku,
eninga kangima eni-enini kondu kolku
nokolemele mele
aku-sikuko pulu lelemú yambuma
numanu monjuku nokuku molai.’ *LLi-pai 19:18*

nimba pelemú ung-manele. ¹⁵ Akiliingga-pe eni eni-enini anju-yandu ung-muranale teku arerembi kolku tombulku niku, aku telsiliiku púngi lem ‘Aku temuláliinga oliu pali molupu kis-simulú.’ niku, piliiku kongnjuku molai.

5:16-26 Yambuma Pulu Yili-nга Minéle-ni Ambololemú Kene Telemele Uluma Kene, Ui-We-Numanuma-ni Piliiku Telemele Uluma Kene, Ulu Kanumanga Ung Te

¹⁶⁻¹⁷ Akiliingga, na-ni enindu mani sipu kene aimá i-sipu niker: Eninga ui-we-numanuma-ni numanu monjulemele uluma-ni ,Pulu

Yili-nga, Minéle topa mania mundumba telemúko; Minéle-ni ui-we-numanuma topa mania mundumbako telemú akiliinga 'Miní numanuna molemále-ni, oliu ambulupili.' niku molku, yunga ungma piliiku, yu-ni "Teai." nilimú mele piliiku liiku teku molai. Aku teku kene eninga ui-we-numanuma-ni piliiku numanu monjuku telemele uluma alsuku aima manda naa tingí. Elsele-ni 'Yambu ili na piliipa mulupili.' niku kir-kiri liilimbeláliinga eni 'teamili.' niku piliilimili mele kapula naa telemele akiliinga 'Minéle-ni oliu ambulupili.' niku, yunga ungma mindi piliiku liiku teku molai. ¹⁸ Akiliinga-pe Minéle-ni eni ambululemú, yu-ni nilimú ungma piliiku liiku teku mulúngi lem 'Moses-ni, ung-mani sirimuma-ni eni ,ka sipa tondulu mundupa, naa nokulemú.

¹⁹ We-numanu-uimani piliiku ulu telemelema eni piliilimili. Yambuma-ni we-numanu-uimani piliiku ulu telemele uluma i-sipa mele:

Waperanale teku,

ambu yima anju-yandu kanuku kum panjiku 'ulu te teamili.' niku numanu kimbú siku,

ambuma kene yima kene ulu-pulu-kisma mindi telsiliiku anduku,

aku-siku telemele uluma kene;

²⁰ 'Méle ima oliunga pulu yima.' niku akuma ola angnjiku popu toku kalku kuru koyoku, ála toku pindu toku,

'Yambu topu konjamili.' niku miambu liiku kupuná ambolku kuru koyoku telemele, aku-siku telemele uluma kene;

yambuma-kene numanu kis panjiku, ele-tu molku, ung-muranale teku,

‘Nanga mélema nanu ambolambu. Yambu lupama-ni naa liangi.’ niku aimá kis-pulu teku, arerembi kolku,

‘Na mendepolu tepu konjupu, molupu konjiliu.’ niku piliiku, yambu lupama-ni telemele mele taki-taki kanuku kis piliiku “Teku kis-sikenu.” niku ung-mura siku,

yambuma-kene ‘Kapula-kapula naa molupu numanu tiluna pupili naa molamili.’ niku sungu siku,

²¹ yambu lupama molemele mele kepe eninga mélema yama meku ‘Enini maluya.’ niku piliiku,

aku-siku telemele uluma kene;

no-tondulu pulele noku kelep toku,

máku toku no-tonduluma noku kelep toku kene ung kísima niku konana kísima níku ulu kísima teku molku,

aku-siku telemele uluma kene.

Ulu kis lupa-lupa telemelema we-numanu-uimani piliiku kene telemele. Eni ui lip-lipi turundu mele kelepu alsupu lip-lipi tokur: Aku-siku teku molemele yambuma Pulu Yili yi nuim kingele molupa nokulemú koleana naa puku yunga moyá-mélema naa liingí.

²² Akiliinga-pe „Pulu Yili-nga, Minéle-ni numanuna molupa ambululemú yambuma ulu telemelema i-sipa mele:

Yambuma numanu monjuku,

numanu siku molku,

numanu waengu nipili táka-niku molku,

ólo-pangí tipili molku,
 yambuma kondu kolku liiku tapunjuku,
 yambu mélema mólu tolemúma liiku tapunjuku
 mélema siku,
 ulu-sikama mendepolu sumbi-siku teku,

²³ yambuma-kene kara naa puku andiki teku
 ták-a-niku molku,

‘Ui-we-numanu-ni piliirindu mele aimá naa
 piliimbu.’ niku munduku kelku ták-a-niku
 molku,

ulu kaí akuma teku molemele. Ulu kaí akusipama ‘naa teangi.’ nimba ung-mani te aimá
 naa pelemú.

²⁴ Yesos Krais-nga yambu molemelema-ni
 eninga ui-we-numanuma ‘Kamu kolupa mania
 pupili.’ niku kórunga unji-perana ‚toku, ku toku
 panjiring kene numanu kanuma-ni waka lelemú
 uluma kene, numanu monjuku ‘Aima teamili.’
 nilimele uluma kene, akuma pali unji-perana
 ‚toku, ku toku panjiringko. ‚Unji-perana toku
 ku toku panjiringeliinga ekupu alsuku ui-we-
 numanuma-ni piliiku ulu-pulu-kis akuma tingí
 kupulanum te naa lelemú. ’

²⁵ Minéle-ni oliu kona molupa kunjuli ulu-
 pulele silimáliingga yu-ni ‘Teku molai.’ nilimú
 mele piliipu liipu tepu molamili. ²⁶ Oliuliu
 oliunga bima we paka naa topu, oliunga yam-
 bumanga te ‘Arerembi kulupili.’ nimbu anju-
 yandu numanuna naa piliipu, yambu lupamanga
 mélema kene uluma kene yama membu ‘Enini
 maluya.’ nimbu anju-yandu numanuna naa
 piliamili.

6

*6:1-10 Krais-nга Ung-Mani “Teai!” Nilimále
Piliipu Liipu Temulú Mele Ung Te*

¹ Angmene, eninga angin te-ni ulu-pulu-kis te temba kene kanukuliingga eni „Pulu Yilinga, Minéle-ni nilimú mele piliiku liiku molku konjulemele yambuma-ni yambu kanili ‘Numanu topele topa alsupa Pulu Yili-kene kapula mulupili.’ niku liiku tapunjungíndu yu kondu kolku táka-niku liiku tapunjai. Eni kepe lupa-lupa ‘Na aku-sipa kundi-ka temba kene ili tekem mele tembune naa tembune.’ niku piliiku kene yambu ulu-kis te temba kanili ung-mura naa siku táka-niku liiku tapunjai. ² ‘Krais-ni ung-mani sipa “Teai.” nirim aku-mele teamili.’ niku eni angenalinga buni we wendu omiba pemba uluma eni-kene wasie menjai. ³ Yambu te-ni yu bi ola naa molemú kene ‘Na bi ola molemú akiliingga „nanga anginele naa liipu tapunjumbu..’ nimba piliilimále yu-yunu gólu topa kene ‘yunga bi sika ola molemú.’ nimba numanale-ni piliilimú. ⁴ Aku-sipa nimba piliimba kene kapula naa temba akiliingga yambuma-ni lupa-lupa numanu piliiku ulu telemelema manda léku apuruku ‘Nani ili tepu konjukur mola ili tepu kis-sikerye?’ niku eni-enini lupa-lupa piliangi. Yambu te-ni yu-yunu mindi kanupa piliipa kene tepa konjumbamanga ‘Aima teker.’ nimba kapula kape nimba numanu simba. Akili kaí. Yunga uluma kepe yambu lupamanga uluma kepe tiluna tere lepa manda lepa apurupa kanupaliingga ‘Nanga kaí, eninga kis.’ nimba apurumba akili kis.

5 Yambuma lupa-lupa ulu telemeláilinga buni wendu ombáma eni-enini lupa-lupa bunima mingéliinga ‚aku-siku teai.‘

6 ‚Krais-nga, ungma bo tunjuli yambu tengā ungele piliiku molemele-yambuma-ni yambu kanili ‚Liipu tapunjamili.‘ niku eninga méle kaí ‚nosulimelema, moke teku yu sangi.‘

7 ‘Na-ni ung nimbu numanuna piliipu ulu tembuma Pulu Yili-ni naa kanomba.’ niku piliiku eninga eni-enini numanuna gólu toku naa piliai. Yambuma Pulu Yili-ni naa piliipa naa kanomba tengā manda mo naa toku, Pulu Yili manda gólu toku naa singí kanili. Yambuma-ni puniena langi-bo mundulimelemanga mindi langima tolemú, Ikeku yandu liilimele aku-mele, yambuma-ni telemele mele yu-ni apurupa piliipa kene mare tepa kis-sipa mare tepa konjumba. **8** Langi-bo kis tengā bole puniena panjilkimelanje langi kis te wendu olka Ikeku li-ilkemela mele aku-sipa yambu te-ni yunga ui-wenumanale-ni piliipa numanu sipa telemú yambale aku telemáilinga langi kis purulimú mele aku-sipa yambu kanili yu mini pali molupa kis-simba. Yambu te-ni ‚Pulu Yili-nga, Minéle-ni nilimú mele numanu sipa piliipa liipa telemú yambale aku telemáilinga langi-bo kaí te mundulimú mele telemáilinga Minéle-ni yu mini pali kona molupa konjupa mindi puli ulu-pulele simba.

9 Yambuma-ni langi-boma panjiku kene, ‚Ombá.’ niku enembu naa kolku táka-niku nokuku molemele mele oliu aku-sipu ulu kaíma temulundu enembu naa kolamili. Langi-bo panjilimele kene penga sika wendu om̄ba

langi tolemú, liiku nolemele mele oliu ulu kaíma temulundu tondulu mundupu tepu ui we enembu naa kolupu mulúmulu lem penga Pulu Yili-ni piliimba enale kene sika yu-ni méle-kaíma simba liimulú. ¹⁰ Akiliinga, yambuma liipu tapunjumulú kupulanum te mokeringa lemba kene kanupuliingga enini pali liipu tapunjamili. Akiliinga-pe Krais ‘Sika’ niku tondulu munduku piliilimili yambuma kumbilepu liipu tapunjamili.

6:11-18 Kangikundu Uluma Telemele Ulumaní Naa Liipa Tapunjupa Tepa Liilimú; Krais Kulurum Unji-Perale-ni Mindi Manda Yambuma Tepa Liilimáilinga Akili Mindi Kape Niamili Ung Te

¹¹ Ya pepá ili ekupu na-nanu topu bi aim aulitepu tokur mele kanai.

¹² Yima-ni tondulu munduku ‘Kangi te kopsai.’ nilimele yi kanuma-ni ‘Juda-yambuma-ni, oliu kanuku kaí piliangi.’ niku kene aku telemele. Enini mundu-mong teku kene ‘Krais-ni sika „oliunga nimba, unji-perana „kulunjrum.”’ nimbu tondulu mundupu piliilimulu mele „Juda-yambuma-ni piliukiliingga, piliiku kis piliiku oliu teku kis-siku mindili naa sangi.’ niku aku telemele. We naa telemele. ¹³ Kangi kopsilimele yima-ni kepe „Moses-ni, ung-mani sirimuma naa piliiku liiku telemele akiliinga-pe ‘Juda-yambuma-ni, oliu temulú mele kanuku kene oliu kape niangi.’ niku kene eni „Krais-ni Gallesia-yambumandu, “Kangi te kopsai.” nilimele.

¹⁴ „Akiliinga-pe, na-ni ‘Nanga bili ola mulupili.’ mola ‘Yambu tengah bili ola mulupili.’ mola ‘Ulu tengah bili ola mulupili.’ nimbu kene aima kape naa nimbú. Auli Yesos Krais oliunga nimba kulunjurum unji-perale mindi na numanu sipu kape nimbu bili paka tonjumbu. Méle te-lupa aima mólu! Yu unji-perana kulunjurum akili-ni na yi kululiele mele moliáliinga ma-koleamanga uluma-ni na ulu te kapula naa telemú; ma-kolea uluma kepe unji-perana kolupa pora sirim mele telemáliinga na-ni ulu kanuma numanu naa monjupu moliuko. ¹⁵ „Juda-yambuma-ni, kangi te kopsilimele mola ‘yambu-lupama-ni, kangi te naa kopsilimele akili ulu te mólu. ‘Pulu Yili-ni, ‘Oliu yambu konama molangi.’ nilimú ulu akili mindi sika ulu te pelemú. ‘Ulu akili mindi Pulu Yili-ni kanupa kene yambuma kanupa bi silimú..” ¹⁶ Ya niker mele ‘Sika’ niku piliiku liiku telemele yambuma enini Pulu Yili-nga Isrel-yambu ‘sika’ma molemele. Yambu kanuma numanu waengu nipili molangi; Pulu Yili-ni eni kondu kolupa, ui teku kis-siring mele mundupa kelepa ‘Pundu tangi.’ naa nipili.

¹⁷ Ung te kamu niambu: Na Yesos-nga ‘kongunale andupu tinjirindeliinga, na turing urulama nanga kangina pelemáliinga yambu te-ni na tepa kis-sipa buni te naa sipili.

¹⁸ Angmene, oliunga Auli Yesos Krais-ni eninga minima we kondu kolupa mulupili molangi. Aku-sipa sika tipili.

„Aku manda niker.”

**PULU YILI-NGA UNG KONALE
The New Testament in the Mara-Gomu dialect of the
Bo-Ung Language of Papua New Guinea
Nupela Testamen long tokples Bo-Ung (Mara-Gomu)
long Niugini**

copyright © 2004 Wycliffe Bible Translators, Inc.

Language: Bo-Ung (Mara-Gomu) (Bo-Ung)

Dialect: Mara-Gomu

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-30

PDF generated using Haiola and XeLaTeX on 21 Feb 2024 from source files dated 31 Aug 2023

0847fea8-9710-5ee4-aeee-ab1d0724af7d